



La presidenta da la secziun dals hoteliers Ragaz Bogn, Doris Kellenberger, flancada dal president da l'uniun grischuna Ernst Wyrsch (dretg) e Jürg Domenig, il mainagestion da l'uniun.



Tranter ils giasts er cusseglier guvernativ Hansjörg Trachsel (dretg) e Daniel Bühler, il Grischun, actualmain president da vischnanca a Bogn Ragaz.

FOTOS G. N. STGIER

# «Prender dapli temp per mintga giast»

Radunanza generala Hotelleriessuisse Grischun

DA GION NUTEGN STGIER / ANR

■ **En l'avegnir duajan ils hoteliers betg pli passentar memia bieras uras en lur biros, persuerter tgirar pli bain ils giasts. Da quel avis è Ernst Wyrsch, il pli «aut» hotelier da noss chantun. Cusseglier guvernativ Hansjörg Trachsel è da l'opiniun che la strategia da reducir ils pretschs saja en il futur nagina opziun.** Tar ina premiera èsi vegnì venderdi per Hotelleriessuisse Grischun, cun salvar la radunanza generala 2014 betg en ina regiun da noss chantun, ma bain a Ragaz Bogn. Cun plaschair èn numerus hoteliers e bunamain 230 giasts vegnids en il «Grand Resort Ragaz Bogn» per assister a la radunanza generala da

muntada istorica. La raschun ch'ìls hoteliers grischuns èn s'inscuntrads sur noss cunfins è che la secziun dals hoteliers Ragaz Bogn-Val Tamina aveva fatg la dumonda da daventar commembra da Hotelleriessuisse Grischun. «Nus essan orientads cleramain vers Cuir e betg vers Son Gagl», ha ditg Peter P. Tschirky, il president da la direenziun «Grand Resort Ragaz Bogn». La collavuraziun turistica cun il Signuradi funcziunia stupent e perquai fetschia ina cooperaziun cun ils hoteliers grischuns en mintga cas senn, ha ditg Peter P. Tschirky. Cun in lung applaus han lura ils preschents beneventà ils hoteliers da Ragaz Bogn e vischinanza en l'uniun grischuna. «Per nus è quella maridaglia davairas in mument

istoric», ha ditg Ernst Wyrsch, dapi in onn al timun da Hotelleriessuisse Grischun. Ventiraivla da quella nova collavuraziun è dentant er Doris Kellenberger, da preschent presidenta da la secziun da hoteliers Ragaz Bogn-Val Tamina.

## Da nov 16 secziuns

A Hotelleriessuisse Grischun appartegnan ussa da nov 16 secziuns sunter ch'ìls hoteliers da Ragaz Bogn han midà da l'uniun da son Gagl tar l'uniun dal Grischun. Per l'uniun dals hoteliers da noss chantun è quella midada da la secziun da noss vischins segir in enrigitment. Quai betg il davos cun avair Ragaz Bogn divers hotels d'emprima classa, sco per exempel il «Quellenhof» ed anc autras bunas adres-

sas. En noss chantun avain nus passa 600 hotels ed a Hotelleriessuisse Grischun appartegnan stgars 400. Da la suprastanza fan part ils presidents da las 16 secziuns e per la nova secziun Ragaz Bogn e conturn è quai Patrick Zettel. Elegids èn quel gremium èn er vegnids venderdi Jürg Degiacomi, Bever per Hanspeter Herren, Puntrachigna, Toni Morosani per Jürg Zürcher, omadus da Tavau e Christoph Schmidt che surpiglia quel uffizi da Marianne Tobler, sco el er da Flem.

## Tgirar giasts ed emploiads

En ses pled da bainvegni ha Ernst Wyrsch ditg che en l'avegnir recumondia el als hoteliers da prender dapli temp per giasts e cunzunt er per emploiads. S'oc-

cupar adina be cun chaussas administrativas e passentar l'entir di en il biro, quai saja betg la soluziun per esser in bun ospitant. Ina sfida per ils hoteliers saja er la nova generaziun da giasts, quels nashids sunter il 1980. Gist quels tschertgan dapli comunicaziun e contact e sajan savens er cuntents cun pli pauc. Cusseglier guvernativ Hansjörg Trachsel è er sa drizzà als preschents e ditg che en l'avegnir saja la strategia da reducir ils pretschs segir fallada per noss hotels. Ultra da quai duajan ils hoteliers er profitar dal sustegn finanziel cun inoltrar lur projects innovativs a ses departament. Novas furmas da cooperaziun tranter ils hoteliers fetschian segir er senn, ha ditg Hansjörg Trachsel e sajan da beneventar.



Er stà a la radunanza è Andy Züllig, commember da la suprastanza da Hotelleriessuisse. Qua cun l'antieriura hoteliera Silvia Barblan.



Dus umens innovativs e plain bunas ideas: Reto Gurtner, Arena Alva e Joel Meier, president da la «Street Parade», Turitg (da san.).



Da nov a la suprastanza appartegna Jürg Degiacomi. Accumpagnà el a Ragaz Bogn ha sia donna Sibylla Degiacomi.



Ina delegaziun pli gronda da Tavau/Clostra: Albert Bachmann, Marc Demisch, Toni Morosani, nov supstant, Jean Pierre Galey e Peter H. Pedersen (da san.).



Hotelieras e hoteliers giuvens cun success: Patrick Dietrich, Segl, Susanne e Chris Faber, Breil ed Irene Gangwisch, Lai (da san.).